

**Sultan Selangor Saran Tingkatkan Kemahiran Kraftangan Untuk Banduan
Bernama
22 Mac, 2012**

KUALA LUMPUR, 22 Mac (Bernama) -- Sultan Selangor Sultan Sharafuddin Idris Shah menyarankan Kraftangan Malaysia mempertingkatkan lagi kemahiran seni kraftangan untuk banduan di pusat tahanan dan penjara di seluruh Malaysia.

Baginda bertitah langkah itu mampu menjadikan mereka tenaga mahir dalam sesuatu kraf hasil latihan intensif yang berterusan sepanjang tempoh tahanan.

"Ia dapat memberi peluang kepada banduan, setelah bebas daripada tahanan, untuk menjadi mahir dalam bidang kraf dan dapat dimanfaatkan kepada masyarakat dan negara.

"Secara tidak langsung, penjara dan pusat tahanan dapat mempergiatkan latihan untuk penghuninya agar dapat menyumbang kepada negara," titah baginda semasa berucap merasmikan Hari Kraf Kebangsaan 2012 anjuran Kraftangan Malaysia, yang bermula semalam hingga 2 April depan, di Kompleks Kraf Khamis.

Sultan Selangor bertitah antara seni kraftangan yang boleh diperluas ialah batik, tenunan, logam, rotan, seramik dan ukiran kayu.

--BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=654198>